

# LEOPOLDS KEMPS NU MIGLINĪKU CIĻTS — MYUŽEIBĀ

**LEOPOLDS KEMPS (30.04.1927. — 03.11.2014.) — publicists, vēstures zynētōjs i pētņiks, izcylō latgališu sabīdriskō darbinīka, ari rakstņika Franča Kempa un rakstņeicas Konstaņces Kempas-Daugules jaunōkais dāls Leopolds beja ari muns radņiks — vacōsmōtes Viktorijas Līpeņas-Daugules mōsas dāls.**

Pazynu jū vysu sovu myužu. Munā bērneibā sōcem sajimt jō vēstules nu Zīmeļu, krīvu volūdā, raksteitas jō mōtes mōsai — munai babeņai, pēc tam daudzus i garus godus — jau latvyski. Pēc tam atbrauce jys pats, izcītis pīsprištūs desmit īslūdzejuma godus, kas par lobu dorbu Arhangeļskas apgobola Kargopoļskas nūmetnē beja saeisynōti par septenim mēnešim. Atbrauce un aizbrauce otkon atpakaļ, strōdōt tamōs pošōs šahtōs Intas piļsātā Komi Autonomajā padūmu republikā jau kai breivs cylvāks i kai specialists. Jys beja pabeidzis kolnryupņiceibas tehnikumu. Padūmu Latvijā jys naspēja pabarōt sevi i sovu saimi. Zīmeļūs jys beja apsaprecējis ar izsyuteitū meitini, ari bejušū politiskū īslūdzeitū Skaidreiti, i jī jau audzynōja meitu Līviju.

Otkon sekōja gari godi ar vēstulem, cikom 1970. godā Kempī beidzūt pōrsacēle iz Latviju un apsamete Leivōnūs. Leopolds strōdōja Leivōnu mōju ražōšonas kombinatā. Tymā pošā laikā jys intensivi i ryupeigi sōce vōkt materialus par sova tāva i mōtes sabīdriskū i literarū darbeibu, apzynōt i meklēt jūs publikācijas. Īpasazyna ar Latvijā dzeivojūšajim latgališu sabīdriskajim darbinikim Bronislavu Spūli un Jōni Cybuļski, sasaraksteja ar Zvidrijā dzeivojūšū latgališu kulturvēsturnīku Mikeli Bukšu. Atmūdas laikā pats sōce raksteit i publicētīs Latvijas izdavumūs, seviški latgaliskajūs — “Katōļu Dzeive”, “Mōras Zeme”, “Daugavpiļs Vēstis”, “Rēzeknes Vēstis”, “Tāvu zemes kalendars” i.c., raksteidams



golvonā kōrtā par latgališu nacionalū atmūdu, par padūmu rusifikācijas politiku, par Konstaņces un Franča Kempa literarū darbeibu, par tāva sabīdriskajim nūpalnim, gatavōdams ari jūs dorbu publikācijas. Jys pasaraksteja ar pseidonimu, kas pajimts nu mōtes vōrda un uzvōrda — Konstantins Dauguls.

Jau sērmā vacumā Leopolds Kemps īsavuiceja strōdōt ar datoru un sagatavōja CD “Franča Kempa un Konstaņces Daugules-Kempas dzeive un dorbi”. Vysu myužu jys dōrgu un svātu turēja sovu dzimtini — breivū un natkareigū Latviju.

Leopolds Kemps guļdeits Leivōnu piļsātas Jaunajūs kopūs sūplōk sīvai Skaidreitei un dālam, Černobiļas upuram Andram.

**Ilona SALCEVIČA**

*\* Franča Kempa mōte beja Pītera Miglinīka mōsa Marta.*

**(“Katōļu Dzeive”, 2014. goda Nr. 12)**